

**Date – 07/12/2024**

**Time - 18:30 -18:40Hrs**

**REGIONAL NEWS BULLETIN**

**HEADLINES (EVENING)**

1. Chief Minister Pu Lalduhoma'n Assam Rifles ram luah an chhuah hunah an ram chu khauh takin an humhalh dawn a ti.
2. Chief Secretary Pu Khilli Ram Meena chuan Champhai District-a raltlante awmkhawmna a tlawh.
3. President Draupadi Murmu-i chuan vawiin khan railway project pathum bakah project dang cheng vaibelchhe 6294 hu North Odisha-ah a hawng
4. Prime Minister Narendra Modia chuan ramchung inkalpawhna tichanglung turin sawrkarin nasa takin tan a la a ti.

<><><>

**CM**

Chief Minister Pu Lalduhoma'n Assam Rifles ram luah an chhuah hunah an ram chu khauh takin an humhalh dawn a ti.

Centre for Environment & Social Justice (CESJ) buatsaih, Assam Rifle ram chhunga thing chhiarpui leh zirchianna (Tree Inventory & Carbon Storage of Assam Rifle Campus, Aizawl, Mizoram) lehkhabu a tlangzarhna ah he thu hi sawiin Chief Minister chuan, Assam Rifles sawn chhuah tur chungchangah hmalak mek a ni a ti a, ram tehin joint survey an nei mek tih a sawi a ni.

Chief Minister chuan khawvelin hmasawna ngialnghet leh rochun theih a ngai pawimawh tawh a ti a, hmasawna hna thawh chu khuarei daih leh leilung tichhe lo thei ang ber an ni zel tawh tih sawiin theihtawp chhuah a pawimawh a ti a, hmasawna hna thenkhat chu ram leilung tichhe zawnga kalpui ngai a awm thin tih sawiin ram hmasawn nan inrawnkhawm a pawimawh tih a sawi bawk.

He lehkhabu Editor hi Dr. Vanramliana a ni a, zirchianna a lan danin Assam Rifles ram Ha 16.9 a zauah hian thing chi hrang hrang chi 480 a awm a, species hrang 80, family 31 leh genera 59 an awm nia chhinchhiah a ni. International Union for Conservation of Nature te tehfung atanga tehin riral hlauhawm tak venhim ngai bik thing chi 4 a awm a, an riral hlauhthawnawm 1 leh dinhmun ngaihtuahawm 5 an awm bawk. An zinga 71 hi ramhmul damdawia hman theih leh ei theih chite an ni bawk.

CESJ Working Chairman Pi Vanramchhuangi pawhin thusawiin, CESJ ngaihndanah ramngaw chu humhalh hmasak phawt ni se an tih thu a sawi a,

Hmasawna chuan ram leilung leh ramngaw tichhe lo thei ang berin, a humhimna dan zawm tlat chungin thawk se an duh tih a sawi bawk.

<><><>

## TOURISM MINISTER

PWD Minister Pu Vanlalhlana vawin khan Sihmui a Tlawng lei rem khawm tawh, dawh kai tur enchhinna, 'trial launch' neih tan chu a hmun ah a enpui a.

Minister chuan Mizoram kawng pawimawh tak thlunzawmna tur Tlawng lei remkhawm mek chu hlawhtling tak a dawh fel a nih thuai theih nan tan a nih thu a sawi a. Khawvel thiamna changkang tak hmang a lei remkhawm leh a dawh hna hi kalpui a nih avangin hun engemaw chen kawng khar a ngai tih sawiin, inkalpawhna tha leh rintlak zawk neih theih nan kawngpui khar rih a ngai a, he kawng zawhtu mipuite chu hun rei lo te chhung lo la dawh hram hram turin a ngen a. Ruahman ang a hna kalpui a nih chuan kar leh chhung hian lei hi dawh kai hman beisei a nih thu sawiin, lei dawh kai atanga ni 120 chhungin lirthei engchi pawhin a zawh theih tur a hawn hman tum a ni a ti.

Chief Engineer Zoramliana tarlan danin Tlawng lei hi ton 450 vel a rit niin metre 90 a thui a ni a, Lei hi hrui hmang a khai pheii a ni dawn a, minute khat ah centimetre 30 zelin pawh pheii a ni ang a, darkar 6 atanga darkar 8 chhung a pawh kai hman beisei a nih thu a sawi.

Tlawng lei hi 'Network Inclined Arch Bridge' a ni a, Poddar Infratech Pvt. Ltd., Delhi ten hna hi March 27, 2021 atang khan an thawk tan a. Project kalpuina atan hian MoRTH atangin Rs. 36.99 Crore ruahman a ni. Lei thar hlan fel a nih hun ah kawng hi lei hlui lam motor zawh theih a hawn theih beisei a nih thu thawktute chuan an sawi.

<><><>

## CS

Chief Secretary Pu Khilli Ram Meena chuan Champhai District-a raltlante awmkhawmna hmun pahnih - Champhai Zote ITI Camp leh Bethel Camp, Zokhawthar a tlawh a. Indo-Myanmar ramri a tlawh bawk.

Pu Khilli Ram Meena hi Champhai Bawrsap Pu VL Remliana, Addl SP Pu PC Lalpanpuia, sawrkar official dang te leh Sub Hqrs YMA hruaitu ten an tawiawm a. Sawrkar hotute leh tlawmngai pawl hruaitute hian Chief Secretary hnenah hian raltlan enkawlina kawnga an hmalakna hrang hrang leh harsatna an tawh te an hrilhfhah a. Champhai Zote ITI Camp-a awm mek te chu Sub Headquarters YMA ruahmanna angin Champhai Zion Vengah sawn tum mek an nih thu an lo hrilh bawk a ni.

Chief Secretary hian raltlan zinga an hruaitute pawh a kawm a. An harsatna leh an dinhmun te a zawtfiah a ni.

Champhai Zote ITI Camp-ah hian tun dinhmunah raltlan mi 317 - puitling mipa 169, hmeichhia 62 leh naupang 86 an awm mek a. Bethel Camp, Zokhawtharah hian mi 399 - puitling mipa 110, hmeichhia 177 leh naupang 112 an awm mek a ni.

Vawin vek khan Chief Secretary kaihhruiin Champhai District-a sawrkar pisa hotulu te an thukhawm dawn a. Ramri chungchang, Solid Waste Management leh Agriculture Department hmalakna te an sawiho ang.

<><><>

## LUNGLEI

Lungleia District Hub for Empowerment of Women, District Programme Officer Office, Women & Child Development Department bul tumin YMA Sub-Headquarters Conference Hall, Lungleiah hmeichhiate chung a hleilenna thleng thin tibo tura ni 16 chhunga beihpui thlak chu nimin khan khar a ni a,

A kharna hun hi Lunglei Sub-Divisional Officer (Sadar) Pi TT Beikhaizi chuan a hmanpui a, Pi TT Beikhaizi chuan hmeichhe chung a hleilenna tihah hian kut thlak ringawt ni lovin, an khawsak leh an nun tinuam lo thei khawpa rilru naa siam te a tel thei vek tih sawiin, chu chuan inkiltawihna leh mahni nunna lak duhna hial te a thlen theih avangin fimkhur a tul tih a sawi a. Hmeichhiate'n mahni dikna chanvo hriat thar tul a tih thu te, hleilenna a lo thlenin dan anga rorel a nih theih nan thuneitute hnena thlen vat thin a pawimawh thu te, chhungkua leh kohhranah hmeichhiate venhimna lam inzirtir uar zel a tul thu leh hmeichhiate pawhin mipate zah thiam zir a ngaih thu te a sawi a ni.

He hun hi Lunglei ICDS Project-a Child Development Project Officer Pi R. Lalhmingliani chuan a kaihruai a. Elimination of Gender Based Violence campaign hman a nih chhan leh hemi puala activity hrang hrang buatsaih dan a sawi a ni.

He hun hmanah hian DPO, DCPU, OSC leh Shakti Sadan staff-te leh anganwadi worker-te an tel a ni.

<><><>

## ASTALAKSHMI MAHOTSAV

Ramchung hmarchhak state hrang hrangte puala DoNER Ministry-in intawhkhawmna lian a buatsaih Ashtalakshmi Mahotsav ni 3 aw h tur chu New Delhi-ah neih mek a ni a,

Mizoram sorkar aiawhin Minister of State Pu Lalnghinglova Hma a tel a, Sports Minister Pu Lalnghinglova Hmar chuan he hunah hian Mizoram leh hmar chhak state-te hmasawmna tur hrang hrang a sawi a, sports chungchang bikah Khelo India Scheme kaltlanga sum hmuh thin chuan hmar chhak state mipui, sports ngaina takte mamawh a puhru zo meuh lo, a ti a. Prime Minister Narendra Modi kaihhruaina hnuaiyah India-in Olympic 2036 thlen a dil thu leh inbuatsaih a tul thu a sawi a, hmar chhak bialah sports talent a awm a, mumal taka investment kalpui a nih phawt chuan Olympics 2036-a India hlawhtlinna kawng sialtu pawimawh tak a ni thei a ti. North East-a sports hmasawn zel nan Ministry of DoNER in hmar chhak state-te special status dil sak thei se, tiin rawtna a siam bawk.

He intawhkhawm hun Hawnna nimina neihah DoNER Minister Jyotiraditya Scindia bakah hmar chhak state-a Chief Minister-te an tel a, he hunah hian hmarchhak state-te puala hun hman niin state pariat atangin an thlai leh thei thar chhuah hrang hrang leh kutthemthiamna hmanga an thil siamte pho chhuah a nih bakah mithiamte inrawnkhawmna hun buatsaih a ni a, state hrang hrangte culture leh zirang hrang hrang entir a ni. Hei bakah hian zai, lam, lemchan, fashion show-te awmin sports lam sawihona hun leh investment lama inrawn khawmna hun buatsaih a ni bawk.

India hmar chhaka MP hrang hrangte sawm an nih angin Mizoram Lok Sabha MP Pu Richard Vanlalhmangaiha pawh hawnna inkhawmah hian a tel bakah India hmarchhak atanga Sport lama mi hmingthate sawm an nih angin Pu Jeje Lalpekhlua MLA pawh he hunah hian a tela, Mizoram atangin zai thiam leh lam thiamte bakah kuthathawktu thei, thlai leh pangpar chingtute, kut themthiamna lama eizawngte leh sorkar mi pawimawh eng emaw zat an tel bawk a ni.

<><><>

## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

<><><>

### **PRESIDENT**

President Draupadi Murmu-i chuan vawiin khan railway project pathum bakah project dang cheng vaibelchhe 6294 hu North Odisha-ah a hawng. Vawiina President-in railway project a hawn hi Kendujhar leh Maurbhanj district inkar ami tur a ni a. Heng bakah hian Tribal Research and Development Centre cheng vaibelchhe 52.4 senga sak tur a hawng bawk a ni. President hian ni 5 cham turin Odisha hi Thawhlejni khan a thleng a. Vawiin tlai khan Delhi-ah a let leh a ni.

Kan Correspondent report ilo ngaithla ang u.

<><><>

### **PM**

Prime Minister Narendra Modia chuan ramchhung inkalpawhna tichangtlung turin sawrkarin nasa takin tan a la a ti. Vawiin khan social media ah he thu hi tarlangin Rithala-Kundli inkar tlan tur Delhi metro hnuaiia siam belh tur chuan Delhi leh Haryana inkalpawhna a ti awlsam lehzual dawn a ti.

Nimin han Delhi Metro Phase-IV project hnuaiiah he corridor thar siam turin Union Cabinet chuan a pawm a. Kum li chung siam tur a ni ang.

<><><>

### **SYRIA**

Syria sawrkar sipaite chuan Daraa khawpui chu hel sipaite lakah an hloh. UK-a awm Syrian Observatory for Human Rights sawidanin hel sipaite hian Daraa khawpui zaa 90 an thunun tawh a. He khawpui hi Damascus atanga km 100 vel a awm a ni.

Hetihlai hian Homs khawpui pawh mi tamtakin an chhuahsan mek a. He khawpui hi Syria-a khawpui lian pathumna niin sawrkar dotu sipai pawl lamin an thenawm khaw pahnih an lak tawh avangin mipui tam takin Homs khawpui hi an chhuahsan a ni.

Jordan Interior Minister Mazen Farrayah chuan venhimna kaihhnawihah Syra leh Jordan inpawhna Jaber border crossing chu khar a nih thu a puang.

<><><>